

大總統鈞鑒敬肅者自龍督交卸之後粵事漸可著手惟善後問題千頭萬緒謹就管見所及為我

大總統縷晰陳之一軍隊宜編汰也粵省軍隊前後兩次獨立增加多至數萬毫無紀律不惟徒費餉糈而且遺害地方必須另行編汰認真整頓以歸劃一而肅軍紀一匪盜宜嚴勦也粵省夙稱匪藪獨立後土匪假藉民軍肆行騷擾較前尤甚非嚴行勦辦不足以保治安但粵人聚族而居若破除情面清鄉緝匪最易鼓怨如有控

告務請查明分別辦理方可期肅清而保治安一欸項
宜預備也粵省軍隊及民軍多至數萬收束裁遣需欸
甚鉅至於辦匪懸賞購線及兵弁傷亡撫卹亦在在需
欸應請飭省長隨時應付庶無掣肘之虞一賞罰宜嚴
明也各軍從新編配之後如有故違節度或不法情事
一經發覺必須按法嚴辦凡出力有功之員即據實請
獎以資鼓勵賞罰分明庶將士用命而匪風自戢以上
數端僅撮要言之是否可行伏乞

示飭遵辦再榮廷前請撥發軍費一百六十餘萬已蒙
核准飭發尚未奉到現下西省財政萬絀金融恐慌仰懇
飭部迅即如數匯給俾得清手續而濟急需實為公便尚
有未盡下忱概託陸軍上將劉承恩參議院議員郭椿

森代達肅敬請

鈞安

新任廣東督軍陸榮廷

謹肅
九月廿三日